



療忘集

并序

海虞馮武

竇伯護

昔華子中年病忘遺前失後闔室毒之華子惘然自得不知天地之有無也及疾愈頓識既往平生存亡得失哀樂好惡擾擾萬緒起矣求其須臾之忘何可得乎余生多故二十年來危疑禍患得喪悲歡不可殫述邇來冥心息慮委順涪湛事多不復記憶今歲客於湖濱觸目興懷愀然不樂從前往事並到心頭發為咏歎寫於

詩歌言不及文事都無緒東坡云歲云暮矣風  
雨淒然紙牕竹屋燈火青熒以是欲忘忘其可  
乎嗟乎忘愈而吾疾痼矣宜華子之黜妻屏子  
操戈而逐儒生也已酉冬日題

自述 三首

咄咄天公欲問遥醉來惆悵醒無聊世情離合春  
雲影時事翻騰瀚海潮蕉鹿縱能因夢悟弓蛇爭  
得似冰消思量三逕饒松菊何事淵明去折腰  
風捲塵沙樹折枝南榮爭得負冬曦無衣祗怪寒

來早有酒翻嫌醉去遲滿地稻梁鴻雁喜一天霜  
雪蕙蘭悲憑誰爲語重裘客莫道靈威不趁時  
回首觀河憶智童無端鬚鬢又成翁稻畦歌月收  
遺穗菜圃鋤煙避盜菘任運行藏和氏玉無心得  
失楚人弓年來懶進橋邊履剖粒敲針釣晚風

山行

寒葉積枯澗松山靜亦香長天餘斷雁古嶺照殘  
陽病覺風威慘衰知酒力強一筇身世外顧影自  
淒涼

呈仲父兼簡補之弟

甘蠅技術信難通萬仞峯頭足半空  
懸蠹卧機三載後途中相見定投弓

驅虎行

乾風吹沙天灑灑落落蝸廬徧枯草  
忽傳猛虎到平原村兒村媪皆驚倒  
虎來豈是人所驅鳴鉦戛竹滿村間  
野無草木山有鹿平原不似深山谷  
猛虎猛虎來何方鄰封豈有宋叔庠

自傷因哭子茂

陸陸庸庸四十春追尋何事不傷神  
江湖豪氣凌雲志却向秋風泣故人

睡醒示補之

覺來無計可逍遙偃卧書牕看日高  
世局輸贏同隱橘人心憎愛只餘桃  
一巢易得林枝穩三窟羞從劔缺勞  
莫歎甌塵兼鬢雪釣竿詩卷屬吾曹

戲示

營營逐利不知休牖北潛聽二子謀  
范氏門前名勢盛探珠取錦待商丘

余與禹思年皆四十而皆有飢寒之患同  
病相憐飛箋見唁次韻荅之

已是平生多失意休言四十已過頭鹽車驥老憑  
誰顧爨下桐焦強自留日月有期同傳舍風波無  
定任虛舟相看莫話窮塵事元會而今未一周

雪裏梅 六韻

一株籬落下漸漸與雲平藥大驚椒白枝肥似玉  
橫欲冰香更斂待月影加明鳥拂輕飛絮風搖綴  
落英鮫綃添品潔鶴氅映神清何事孤山客偏於

水畔行

旅次秋夜

雨過蛩聲起誰家度桂香清風來故里明月照他  
鄉病久孤吟怯愁多一夢長蕭疎秋且盡雲漢欲  
重陽

不睡

欲睡不得睡愁深到曉風雞聲人夢後蛩語月明  
中

咏錢

與君無夙好思却欲如何自古英雄輩空爲大折  
磨

雪夜和補之

次韻

誰道堯年似此寒半空風急旋成團鶴翎墮久塵  
埃淨柳絮飛多草樹殘只恐泥中融日易更嫌波  
上托冰難茆檐若箇愁僵卧共爾浮樽強自安

再和

霏霏漸欲射人寒壘石峯低玉一團浙瀝書牕三  
盞盡青熒燈火一編殘聲微永夜尋詩苦光積空

庭欲睡難待得深山等身後將心同去覓師安

海外畸人七十生日

四首

一樹雲槐綠映天門前流水故依然自隨親舊稱  
觴後再捧瓊漿又十年

劫外灰然更錫齡觀心唯欲悟明星無端憶著窮  
塵事只向楞伽一卷經

萬里雲山返故村

曾遊粵西

操蛇應懼足兒孫年來夢

覺都無與扶杖茆堂盡一尊

釣磯無恙雨朦朧長坐鷹揚鶴髮翁屈指三千六

百日阿誰弓馬獵非熊

十二喻詩爲節婦壽

冰

峨峨遙映是層冰久向深山作水精千歲豔陽消  
不得萬重寒水結還生慣經霜雪神逾健不受塵  
埃骨亦明願得斲將貽壽母手持如意見初平

霜

一年風景一宵殘萬里青天帝女寒不許名花恒  
綽約獨憐修竹任檀藥風威曉共砧聲下月影秋

隨雁陣看誰識石餘同壽母稜稜嚴重更辛酸

雪

晚來一望失山尖白勝楊花潔勝鹽明月照時光  
更異輕霜覆得綵加添管教濁世無塵土獨許清  
溪映酒帘惟有深閨堪比德風裁名節兩相兼

月

皎皎疎林欲上遲空庭靜照有誰知一宵寒影驚  
蛛網萬里秋風憶桂枝盡掃輕雲容獨步不教微  
露漸相欺姮娥最惜深閨意常遣清光鑒薄帷

鏡

一片菱花架玉臺清光不遣起塵埃似天晴雨真  
堪異比月盈虧豈足哀出匣早知天下膽看銘猶  
帶劫前灰鬢絲莫慢相驚怪若箇朱顏去復來

釵

綠雲頽處竦瓊瑤山樣修眉月樣梳頭似丹山棲  
鳳樹股如黑水換鴛書千年井底和泥起萬里蠻  
方擊鼓餘待得海中塵起後仙姑高插坐金輿

金

役役乾坤衆所趨得時難却失時無源從麗水生  
何盡聚向燕臺用自殊剛德任教從大冶堅心不  
復畏紅爐莫言多壽誠多辱有壽金多道亦腴

玉

石中遮莫漫言非一片醇良自有歸溫潤不渝知  
德至精神深韞覺山輝藍田產質淵源貴崑嶺分  
教口望稀道是種來應未久千秋名寶勝珠璣

柏

曾共高松度歲華丸丸心性不槎枒共姜河側堪



依泊蜀相祠前勢攫拏節勝秦封三品貴香分殷  
社萬年遐可知母壽如君茂祇抱堅貞不自誇

松

也同梅竹愛山深獨挺虬龍出茂林招得清風和  
唳鶴好留明月聽鳴琴根從古澗穿竒石韻作秋  
濤度遠岑若把龍鱗問年紀冰霜風骨歲寒心

珠

不羨鮫人兩淚零車前徑寸照宵行龍歸瀚海方  
深睡蛇向侯門報再生錦帳孤懸驚夜白玉波圓

折媚秋清香閨却愛循盤走長斂孤鸞對水晶

錦

一濯煙江色愈鮮爲人衣被自年年鴛鴦機上猶  
雙宿芍藥闌邊更獨妍繡帶花繁紅雨地報章霞  
散彩雲天春風堦下芝蘭茂競看徧爛舞膝前

題寶嚴寺兼贈黃禪師

寶嚴塔爲江南  
第二廢久矣

宰堵波何在猶殘舊覺場莊嚴極吳越

武肅  
所創

兵燹

廢淮張曉磬侵松籟明燈照印香清規今底柱露

頂事空王

師受戒於  
見律師

偶書

浩浩乾坤未有涯科頭獨坐日西斜妻兒田舍同  
雞肋禍福榮枯似犬牙未得便登陶峴舸且須重  
理尚平家塞翁最解天公意不怪年來事事差

喜有仲自滇南歸

五年頻夢見君歸夢裏還愁又恐非今日見君非  
是夢始知前夢本依稀

臨流

臨流一餉可忘飢始向今宵悟昨非窺圃無心幼

安榻撫編長愧仲舒惟知交散去吟詩少兄弟踈  
來醉酒稀可惜半生愁裏過枉教春夢漫依稀

野步

屑麥煨芋又一餐逍遙天幕覺心寬柴門水蘸添  
苔碧草徑霜消似露溥獵客尋聲奔曠野釣翁無  
語立漁灘吾生懶散真吾事負手橋西興已闌

忽憶亡友毛補仲周子茂

傷心心事有誰矜除是同心不我憎一旦晨星相  
繼盡斷腸身後剩青蠅

七夕聞鵲聲

雨洗飈車月映針紛紛烏鵲語秋林天河遼闊應相待却向人間報好音

題家虞牧友古堂

一畝煙霞置此身堂開友古得名新由他國士兼鄉士總是今人讓古人緯史經經殊有味醴甘水淡自難真知君獨得論交法數卷殘編最易親

秋雨

秋雨颯然至秋風戰薜蘿家貧爲客慣身賤德人

多戚戚真徒尔悠悠又奈何可堪顏鬢改重去問  
宮娥

書肆見先伯父遺書有感

歷代圖書聚一門牙籤玉軸屬雲孫今來市上拋殘帙腸斷丹青認舊痕

先憲副以來書籍皆歸世父

新月代寄

一曲瓊鉤吐碧霄湘簾初捲玉光遙憑誰爲語張京兆明旦雙眉取樣描

代贈隱湖公六十生辰

秦時聚落晉時人詠月吟風六十春三徑寂寥通  
有道一村煙火賴施仁陶潛姓氏當門柳郭泰風  
流塾角巾慚愧通家孔李似年來几杖許相親

咏菊

有色無香不逐春輕霜新拂見精神素屏影動燈  
含笑却似回看送酒人

萍子集

并序

海虞馮武竇伯

余幼而失學逾弱冠方龕涉經史竊歎古人名  
理浩如江海而余以鼯鼠飲河一勺輒止其何  
鄙邪半生多故志與境違事有不可於意中者  
不得不寓之於詩詩成而卒不忍置昔人有稱  
萍子於鄉豪者鄉豪取而嘗之蜚於口慘於腹  
哂而怨之其人大慙余詩之不爲萍子者幾希  
矣因以名篇云壬子冬日記

閨怨

重婚意不  
適故傷之

不向金徽憶鳳凰  
淡然情性自淒涼  
愁來彤管慵書字  
病起薰爐怕藝香  
冷笑人間多嫫母  
深竒天壤有王郎  
玉房翠被渾拋却  
却愛空庭月一方

代上督漕盧使君一百韻

今上初登位  
明公甫蒞虞  
旬宣纔四載  
慈惠徧三吳  
緊邇兵荒繼  
因茲戶口逋  
軍儲方待給  
民瘁更難蘇  
朝宁憂財賦  
臣工慮輓輸  
何期膺帝簡  
暫令去皇都  
福曜臨牛斗  
哀鳴恤雁鳧  
健兒參從騎  
邑

長負前驅裕國思  
嗟辦流民欲畫圖  
運籌煩夙夜  
剖決不須臾  
赤子皆叨庇  
姦胥盡伏辜  
千軍威節鉞  
萬艘戢江湖  
自古經邦術  
全憑應運儒  
蕭公恒轉粟  
子翼向分符  
隱隱長城重  
迢迢半壁孤  
烹鮮推至治  
馭朽展嘉謨  
仗衛晨應放  
琴書晚自娛  
廉平恒獨矢  
曠達更誰拘  
鼓扇仁風遠  
漸摩教澤孚  
經綸真柱石  
清澈是冰壺  
共喜爲霖徧  
誰知降嶽殊  
衡峯高蘊玉  
漢水媚含珠  
日月浮雲夢  
風煙接具區  
地靈人俊傑  
家僻路崎嶇  
瓊笈皆尋覓  
珠宮

亦覲覲朝吟看月淡夜讀見燈枯德粹身加潤神  
清貌益癯三冬方朔比千乘茂先逾已就藏山業  
還曾涉世途槐黃提兔管沙白策驪駒鸚鵡裁新  
賦鸞鳳出舊笈詞壇欣掉鞅策府恣彎弧器量欽  
瑚璉鋒鋷儼轆轤文章思道筆學行子家模適會  
遭龍戰權經綰鶴跗旋聞過小劫即更鑄洪鑪明  
月終當乘荆山早見剗蛟鱗飛鮪鯉龍劍躍錕鍔  
小試三齊近尋遷百粵迂始惟開草昧終更歷勤  
劬公道歸當軸知音賴秉樞中州清賦藪南國董

漕艫接誘曾無倦精勤却自愉直教民視父特與  
聖爲徒戟戶方嚴闕琴堂敢曳婁獨垂青眼視偏  
許沒階趨自分難窺管安能學濫竽幼承先子訓  
慙守少年軀竹戶梅爲援村郊水當郭未堪從仲  
舉準擬效樊須無恙遺書在多愁舊業蕪可知時  
坎珂空被鬼挪揄白水三秋雨青錢一逕榆得花  
聊索酒偶咏廢催租世路羊腸險人情貝錦誣何  
當事筆硯難與伏菰蒲多侮慚棲厦無能怯守株  
屢蒙恩卵翼寧但刻肌膚天道欺猿鶴人間足虎

龜自非依底柱何以步康衢憶昔車初下於今衣  
屢摳龍門親自挈山閣許同扶既勅登階砌尋呼  
侍坐隅分曹觀越舞異席進吳歛進載申憐艇和  
盤屈愛胸清芬時啜茗甘滑且嘗酥鴨齋供齊饌  
松醪出阮廚喜真情欲舞醉恐氣彌麓灌灌承先  
業諄諄畜友于溫恭眉宇霽斐豐笑言俱當父營  
巢隱聞公待價沽史書皆健羨嗜好不相渝兩地  
艱謀面中年痛忽殂神交誠古道高誼覆諸雛文  
季憐堪後元暉獎闇愚玄門同咫尺汪水更滌紆

玉屑霏談塵珠璣落唾孟二天嘗戴仰五內實鑄  
鏤幸得晨昏見行看歲月徂政成方俟召擢顯定  
加俞商楫應須寄天關未可呼升聞今有待遺愛  
古來無旣克勤民隱兼能佐國腴兒童迴竹馬父  
老獻青蚨異蹟皆能誌私言豈好諛敢隨人涕淚  
未解獨嗟吁自發湘沅秀真教楊馬奴光華高萬  
丈才氣敵千夫竊祕中郎帳思從司寇桴雲泥終  
隔礙進止久踟躕無地容持杖何才爲執爻酬恩  
慚鳥雀負德愧眉鬚孱獨疇依怙因循但囁嚅羣

情別寒暑薄俗計錙銖動足纏荆棘潛身執黍稷  
併蒙祈覆燾廷陛早陳敷有道調羹鼎多情愛屋  
烏餘波千里潤銘德萬言鋪琴水秋風爽山城曉  
日煦豐碑爭頌禱咸爲范陽盧

病起吟

有序

荒村淒寂卧疴浹錢子梅仙瞿子鄰  
鳥暨家兄芸叟先後唁余不勝足音跬  
然之喜病起蕭然塵案所設剩有秃筆  
殘墨蠹書破硯餘紙盈握而已其以爲

鬻薪米家之所棄乎感歎之次各賦短  
章以寄三君子開函一笑

秃筆

退久未入塚和塵蘸墨濃書愁又書恨長在寂寥  
中

殘墨

無幾山松煙安能發光澤枉今天下眼見黑不見  
白

蠹書



數帙蠹之餘猶爲累世守多幸嗜者希尚是貧家  
有

破硯

何年出端谿刃缺似斷礎誰言無惡歲視之等塵  
土

剩紙

杵竹造成紙堅薄應無耦若教比人情一紙猶爲  
厚

叔祖母陸孺人貞節頌兼呈明發叔

吾祖棟名教代天渙王章曰有節義行靡不奏君  
王遺訓被後裔列世振遺芳維我叔有母潔行照  
高堂于歸日未久遽尔析鴛鴦子母相依倚凜凜  
三十霜富不羨紈綺貧不厭糟糠陶母真堪匹桓  
嫠洵可方誰當奉簡書持以獻廟廊寵綏勵末俗  
豈止宗族光

崑山葛瑞五移家入青芝山學道次確菴

師韻奉寄

玉峯猶道逼人閒更向青芝去不還雲護劉安雞

共犬月明鄧尉水兼山藥成丹竈長須守草長書  
牕不用刪好學稚川偕婦子松根同聽澗潺潺

再疊前韻

高峯四面截人間乘興移家便不還落落暮聲消  
永晝微微鳥語蒼空山庭棲海鶴長爲伴屋繞梅  
花不忍刪莫遣他年劉子驥桃源惆悵水潺潺

不寐作二首

出俗勢所難入俗非所喜所以五柳翁一醉而已  
矣

雞鳴是非至翻覆都幾許賢哉高座僧不復學漢  
語

至除夜往祭亡友子茂環堵淒涼一棺寂  
寞寒風刮面四顧無人死者縱無知生  
者能無慟乎反袂拭面而哭之以詩

白茅藉飯至除時腸斷如君竟餒而只有風塵吹  
旅櫬更無子女出空帷彭殤漫道都爲夢禍福休  
言便不私千古虞翻真負屈枉教蠅哭動人悲

許節母詩

邑人許  
惠蓮母

茫茫東流水誰爲障狂瀾幸有深閨範能爲人所  
難許君有賢母五十已蓋棺讀其節義狀令我淚  
沈闌十九歸許氏二十析鴛鴦孤雛纔九月誓死  
形影單從茲三十載凜凜霜雪寒名教陵遲久贈  
藥而采蘭頽風不足怪孰肯長辛酸我願節母行  
斲石通衢刊使知事二夫女德匪所安

其二

忠臣皆死國其道則有異從容就義難慷慨赴死  
易賢婦皆死夫其道亦有二婦節難守貞婦烈輕

自斃大凡人之情經久移其志賢哉許氏母自少  
及老至旣克矢汎舟不復效斷臂吾鄉風俗衰綱  
常幸未墜忠有臨桂公節有高陽氏流芳天地間  
忠節同一致下乃爲地維上可作天柱

荒村建子月

五首

荒村建子月愁見催租吏搜牢盡雞犬傳役及童  
稚藁秸場圃空銀鐺官長恚春夏多焦勞遺累在  
農事

荒村建子月愁見索逋人子母積歲月追呼禍比

鄰始因逼寒餒終極困形神安得長缺客一甍百  
憂民

荒村建子月愁見無衣叟蝸舍破見星桑樞斜欲  
朽鶉衣百結難蝟縮三更後引領大襖子南榮負  
暄久

荒村建子月愁見無食兒剖冰引凍魚踏雪換冷  
養草枯藜藿盡突寒菽水遲豈知膏粱子萬錢下  
筋時

荒村建子月愁見機中婦侵霜齒擊頻投梭手戰

久日短一匹餘衣單九秋後新行折變令稅急賤  
相售

學道四箴

學道莫畏貧畏貧喪厥真寒餒久相迫怨責交室  
人寤寐不自勵求乞或因循不見繩樞士天子不  
得臣

學道莫厭賤厭賤志爲轉有意不自舒寒暖逐人  
面一念失堅忍勢位生健羨不見乞哀者昏夜惟  
恐見

學道莫徇名徇名德弗誠顧惟盡吾事安用市虛  
聲白玉投熾火薪盡質逾明芻狗衣文繡捐棄一  
何輕

學道莫嗜利嗜利必違義萬鍾與一介可否亦何  
異矢志惟寬假即爲紛紛華餌吾苟無所須金穴安  
足計

雲

未必無心是等閑輕于粉絮厚于山高低渺渺蒼  
茫際離合紛紛頃刻間自去自來靡有定疑風疑

雨總多般野翁負日臨溪坐惱殺飛陰覆釣灣

確菴師卧病婁江寄詢 六首

聞道三冬久卧疴牀頭猶未詢如何可知龍叔應  
難愈文摯神方未足多

身外有緣皆是病眼前無物可爲醫年來二豎神  
通大扁鵲逡巡且任伊

寂寂維摩方丈室雨華誰見見塵埃瞿曇若遣諮  
安否不是文殊不敢來

穀是臧非總莫干維師爲道勉加餐何方早逐幽

憂去養得神怡體自安

莫把身心祇自勞且將物外共遊遨春山雲樹堪  
登眺嶺有梅花洞有桃

德全久矣禱於神強起橫經啓後人慚愧楮冠藜  
杖者坐看房杜出河汾

秋孫出山遠遊遇余於隱湖樓頭歌以送  
之

落托生涯各一方高樓風雨話行藏萬峯花下移  
家久千里雲中去路長自有車茵容大吐爭依蘭

燭乞餘光淵龍霧豹踪靡定珍重臨歧盡一觴

覲菴陸子五十生日次退山翁韻

憶君甫弱冠先子早相識文章道誼閒勅余就繩  
墨相去才九齡相勗已多術君學正未央我願故  
難畢當世論詩者紛紛派不一嘉靖才子五成弘  
才子七膚詞即充腴臆見亦偏側蒙叟闢坦途廓  
如無闕塞後代能文家不辨文與筆俚俗競駢麗  
鄙嘖爲卓逸幸有震川翁克入龍門室君從東澗  
遊吟成如錦織亦愛玉峯文勘讎功倍密古音自

微渺安能聽感策神理本縣縣學者貴不息顧余  
失途人固知所從出麻麥阡東西桑竹陌南北豈  
知道所在不離亦不即遙望山城隅伊人朴無飾  
裹足萬卷樓儼如面南國爲書驅豕魚如農惡螟  
騰匪是世可遺洵知古可食朱黃研曉露晨起欣  
有得丹穴鳴朝陽渥洼長季肋賢哉二儁裔事事  
可矜式今春歲在未屈指崧降日韶光正無限何  
用苦邀勒勿憶古華胥夢醒翻若失晨昏一卷書  
書淫尠儔匹三萬六千日所讀應無極

終

溯洄集

并序

海虞馮武竇伯

辛亥春訪毛子斧季於星橋時斧季方載書北  
遊行解維矣邀余過舟中握手言別篷窻之下  
牙籤玉軸爛然奪目余顧而笑曰余即非季膺  
亦可不告家人同載也遂從昆湖溯尚湖異書  
良友相顧甚樂湖山淡蕩一棹夷猶倚篷根而  
咏曰乍起天風水淡蕩新收煙雨嶺模糊斧季  
賞而和之自是過毘陵越京口訪丁卯橋望蘄

王伏兵處觀瓜步戰場廣陵煙月直渡邗溝謁  
韓信廟傷今弔古無處不吟無吟不和迨興盡  
而返所得已成帙矣往來千里旅況蕭條興到  
狂吟詞多蕪穢然聚散之情遊歷之感不無繫  
焉日長無事重閱斯編因憶當年倡和時似醉  
如狂互相誇獎吾兩人意氣直出古人上余所  
得句如斗山曉發云踏雪老僧遙乞火出巢靈  
鵲早占風丹徒登陸至江頭云一日身經陵又  
谷百年名付馬兼牛江中云白馬風驅千里雪

金鱗日湧萬重星斧季擊節歎賞以爲奇句今  
視之不覺啞然也甲寅夏五自識

舟泊大河有感

三首爲余  
母氏故里

蕭條敗葦晚風涼一宿孤舟欲斷腸四十餘年同  
過隙如何墟里幾滄桑

大范雲初自合長今來蹤跡剩殘陽一方衰草眠  
牛地猶是嬉遊竹馬場

幼從母氏喜昌昌中外同登聽雨堂

外王父  
堂名此日

更來誰識面含辛自覓舊牆匡



過宴林庵贈緣六開士余族叔也

絕學久無主吾宗洵有源能書傳七代

師為惺庵公七代孫

又能書比永師之於右軍也

善詠媿諸昆

師與兩伯父皆以詩名比畫公之於諸謝

也祝髮知幾早

師於鼎革前薙髮

遺家入道尊我來殘照

裏獨立叩松門

### 毘陵道中

遙望毘陵萬戶煙川原如故景蕭然往來人語聲  
難辨絡繹山頭勢若連衰草亂拋蕃帳馬曉霜輕  
覆估人船多情只有風前柳處處相迎在客先

### 丹陽道

兩岸崩崖天欲曉官樹陌塵吹未了犢車特特輾  
紫泥局促驢兒啣衰草南北交馳語雜沓茫茫塵  
土行人老用晦吟編千古師石橋何處尋丁卯

### 過潤州

毳幄瓊庭百里寬嚴城如甕鎮江千魚龍寂靜波  
濤冷狐豕縱橫草木寒豪傑未能還馬革人民猶  
自怨猴冠分明往事同春夢野燒青青戰壘殘

### 渡江

一點金山看不盡更憑雙槳到江心漁師艇小輕  
於菜賈客檣高密似林浪起日邊潮滾滾雲飛天  
半島陰陰吾生已信同鷗鳥萬里風濤暢遠吟

金山和斧季韻

一拳拋巨浸翠嶼獨標竒樹禿迎風急鐘清咽浪  
遲星河旋地軸日月盡天倪豈是人煙近焦公更  
北之

維揚六韻

浮生難得壯遊頻慚愧腰纏跨鶴人煬帝風流千

古在參軍詞賦六朝新萋萋芳草雕輪穩處處垂  
楊錦纜春綠酒紅燈南北客樓船畫舸往來津一  
城簫管歌明月四野飢荒歎劫塵聞道瓊花更生  
藥淒涼僧舍獨逡巡

維揚道中

出郭迢迢赴上游斜陽相逐去揚州塵埋岸草春  
難綠鼎沸關津晝不流楊柳丰姿迷禹甸英雄蹤  
跡剩刊溝錦帆煙月非余計已擬身同不繫舟

次和斧季舟中燈下八韻

一水路迢迢春寒草木彫剪燈吟椽蠟沾酒醉蘭  
船逐爾書千卷拋余飲一瓢論心嫌漏促問難喜  
程遙開卷頤先解尋詩膝屢搖醉鄉應共到文陣  
許頻挑未合窮愁去偏宜塊壘澆人生自行樂生  
事付明朝

途中作

一帆風不動兩岸去如飛客路程程異鄉音漸漸  
非

過淮陰侯祠

四首

天遣斯人佐乃公陰陵神策扼重瞳淮陰市上紛  
如故一片荒祠晒馬通

鼎足謀深仔細裁君侯心事竟難回思量雲夢生  
擒後長使雄心盡死灰

三傑惟君最莫當臨刑方始歎弓藏高皇本自多  
猜忌不合功成奏假王

意氣騰騰邁等夷誰言絳灌是男兒回思三族無  
遺類何事功成不采芝

途中

紛紛旅況浩無涯馬作蒼頭艇作家夜半獨看千  
里月春深未見一枝花但思名酒傾三雅枉負奇  
書載五車落托襟懷任行役也教鄉夢起長嗟

淮上哭史忠靖

東南形勝屬江淮控扼咽喉藉異才泣告兩河恢

社稷旁求多士佐雲雷出師拜表雄藩殞高傑被刺移

蹕封章賊相猜馬士英力阻其議大厦究難支一木茫茫

遺骨久寒灰聞公出城死於鄉兵之手

浩歌荅斧季

無心莫作天上雲疑風疑雨徒紛紛浪迹莫爲水  
上萍忽離忽合非人情丈夫立志須自持莫以炎  
涼失所之甯戚飯牛終遇主李斯末路悲倉鼠虞  
卿棄相窮而愁班生投筆竟封侯自古男兒不可  
磨眼底并沈如鏡花騰騰任運我有我莫向尊前  
悲坎壈

淮上別周子敦四首

涇渭無間隔波流各爲途膠漆本異質相入兩不  
殊古道有真意遐邇安足區我本菰蘆客遠慕淮

海徒頑石雖粗厲或爲良玉須

皎皎雲中鶴飛翔徇所之誤落塵網中天衢去無  
時仰首睹鴻鵠含愁如有思園林非所好鍛羽豈  
其宜千載知心者支公杳難追

湯湯古淮水東流直千里歸帆風力滿夫豈余所  
喜春風水上萍散聚亦無已征塵瀾大道飄蓬吹  
復起柳弱不堪折後晤安能擬

吳山饒古梅春寒花未央淡靜君子德遠勝蘭茝  
香明月照洞庭飛雪滿前岡鱗鱗點蒼苔鐵幹橫

風霜安得出塵士賞此幽谷芳

旅人歎 三首

舟人語

舟人語往來相訴多辛苦去年洪水水拍天江南  
江北皆失所我來自吳至淮上千里蕭蕭無黍稌  
粟貴於玉桂似薪草舍霜封莫舉火篙師鬻渡行  
者稀糠覈不充日卓午日卓午啼兒女

運漕艘

運漕艘八省民膏供帝有危檣似槩千里聯徹曙

邪許雜刀斗舳艫塞川行路難農舟跼蹐賈舶後  
但願王舟及時走一任三星照魚罾照魚罾民籍  
口

捐水災

捐水災皇恩如雨自天來東南夏秋風雨惡平疇  
白浪轟如雷民生幸緩須吏死不念飢妻不念子  
惟恐王租刻期俟打門吏至無藏處帝臣銜血請  
捐租帝嘉臣言帝曰俞小民拜詔欣且舞豈知中  
更飽吏胥吏胥飽不敢道

歸途作 四首

北去南來路嶮巇勞人云是上天梯我來却笑緣  
何事也逐征夫趁曉雞

巧于蛛網密于雲一種心情窈莫分我欲歸來拳  
足坐加餐麥飯到斜曛

生計無聊去故村荒廬松菊可能存敝裘寂寞歸  
來晚孤負兒孫競候門

百里山光虞仲城順流遙指布帆輕綠楊春水江  
南路處處歸程是去程

南... 枕流草... 癸丑春舟過昆湖南見草廬一區枕流傍竹空

枕流草 并序

海虞馮武竇伯

癸丑春舟過昆湖南見草廬一區枕流傍竹空  
若無人詢之田更曰此村塾也若能師桐子則  
薪水之資可無慮余驟然曰昔人磨鏡補鍋亦  
以謀食耳薪水足矣我又奚求遂挈家而家焉  
而顏其室曰枕流晨夕無事坐對碧流凡三易  
春秋而始盡其趣蓋水之為道也媚於春勞於  
夏淨於秋而定於冬綠楊春水波紋如縠落花

風起片片隨流其媚也田事既起兩岸桔槔聲  
出聲入日無停晷其勞也秋月輝映空水澄鮮  
雲影去來清光澈骨其淨也風雪未寧寒冰欲  
斂遙睇瓊林遠壓龍骨其定也水與時之異其  
趣如是而我悉有以得之我之於水庶幾無憾  
矣迨歲乙卯親戚故舊迹余避地之所以生日  
詩來責者踵相接積成數十首又以閑適感歎  
之作附之而成帙是不言水也而亦枕流之所  
得遂以名篇云乙卯初夏自識

湖上吟

四首

野性偏宜野家依苦竹叢秋風吹蟹舍落日照牛  
宮木脫山容瘦雲歸水面空廓然澄萬慮信步過  
橋東

久與農相習方明汜勝書高低宜黍稌老弱更樵  
漁防潦添堤土憂霜護野蔬蠃蝸最堪玩取樣覆  
柴居

依竹棲蝸舍開窻爲遠峯市塵松菊遠野色水雲  
濃世治惟思老門衰漸向農猶殘書數卷聊以過



三冬

嚴風籬落淨霜足菜根甜欲譜漁難備曾疏穀屢  
添珠胎淵蚌滿鋸鼻海蝦尖屐響誰相過前村颺  
酒帘

休歎

年豐休歎獨啼飢五十無聞一布衣隴上持竿驅  
鳥雀途邊戴笠避輕肥更無禮法容踈散猶有傳  
聞起是非夢入華胥誰喚醒寒波無定雨霏霏

寄師周

西望浩無盡君應獨醉眠親朋自恬淡詩卷更留  
連會面無一事相思若隔年願將明月意同賦白  
雲篇

家共叟兄六十生日

四首

閱盡滄桑六十春覆巢危卵泣窮塵艱難久歷人  
情異辛苦親嘗世味真舊業詩書誰是主衰門蘭  
玉更何人壺觴滿酌荆花下悲喜相兼痛飲頻  
無端祖業屬雲煙心火中宵每欲然愁裏風波難  
自解恨中天地惱人憐老看蝸角爭蠻觸醉想槐

根樂聖賢安得共酬婚嫁累空山閑坐過餘年  
幾歷刀峯與劒林顛毛霜雪最先侵看多薄俗消  
浮想閱遍危途長道心食藿尚悲將父淺負暄空  
抱愛君深憐余也作同飛雁慚愧高曾大樹陰  
無聊嘗共話辛酸傲骨家風未可干敝極不辭行  
雪履飢來懶去逐金丸兒孫未免三生累富貴明  
欺一命寒珍重暮年餘蔗境但留殘淚廁衣冠

自嘲

黃菜村前村夫子三間老屋枕寒水日課翮鬚入

九兒濁醪麤飯無餘事連朝戶外霧瀾瀾山妻相  
戒寒風起寒風起君莫惱牛衣蝟縮忍至曉平生  
志不在溫飽

漆園五十生日

至德洵堪師吾黨襟期坦率氣雲霞鬚粘塞外干  
山雪筆掃河陽一縣花房杜功高汾水重嵇劉星  
散竹林遐田園守拙惟爾我風雨衰翁共歎嗟

梅仙五十生日時僑居毘陵

瀟洒風情擅竹林年來名價重南金八叉賦就吟

燈淺三雅香浮坐月深不將不侯今日事非夷非  
惠古人心貧交百里遙相賀五十顛毛雪未侵

追憶外舅潛在先生

次周仲榮韻

不見先生十五年每逢觴咏便淒然人情生死分  
今古世路滄桑又變遷獨擁書城真富貴早歸泉  
壤更神仙慚余豈是冰清比一硯嘗耕歲十千

弘農夫子六十生日

絳帷高捲掩花關灌灌燈前夜月閒刻楮未能如  
菜巧鑄顏空愧似雲頑紫荆榮映田真舍玉樹香

開謝傅山聞道大年多至德及門小子鬢先斑

馬退山八十生日

總角驚看古貌初今來又是八旬餘丁年幾見人  
民改亥字長看歲月徂霧暗公超朝講學燈明麟  
士夜鈔書寒風獵獵江茆白一老鷹揚坐釣魚

戲示有仲時將之新安以伉儷新諧躑躅

不進

雨霽高樓迴端居怯遠行可知高世遠最是得人  
情

昭于五十生日

長日吟君自壽詩。嗟君才調不逢時。辛酸世味巡  
檐索。翻覆人情背地思。已感莪蒿慵捧檄。未當楚  
趙且囊錐。六千三萬纔過半。結綬懷金莫歎遲。

挽曇谷先生

平生未識瞿臨桂。猶幸橫經從長公。長向日邊占  
瑞氣。更於雲下望雄風。田園木落茅堂在。觴咏人  
非綺席空。他日精靈終抱恨。移山填海志西東。

顧丹丘八十生日

半歷承平半亂離。八旬老叟不扶藜。衣冠不改陶  
公貌。蘭玉還期謝傅兒。種杏人歸聞嘯虎。燒金仙  
至酌交梨。過頭甲子四百八。幾見搢牀舉伏龜。

寄李秋孫

由他塵海遍栽桑。不改青蓮舊日狂。市上破琴驚  
伯玉。車前相骨歎孫陽。戴天隱抱終天恨。閱世曾  
思避世長。此日春風裘馬客。侯門何處醉瓊漿。

過子游墓下哭先仲父定遠府君

一片寒山木落天。空樓風雨涕漣漣。深慙猶子顛

愚甚辜負先生屬望偏書法力追鍾傅後詩源遠  
溯杜陵前修文命下忽忽去誰爲狂瀾障百川

挽嚴元功 卒於六月

天地熾然時先生委形去精神歸其門手足惟所  
啓萬有不累身一經淡遺緒哀哀孝子心白雲望  
無處

次韻酬確庵夫子

歷世家傳抱愧深從師幸復聽元音遮頭猶剩數  
莖髮繞指還羞百鍊金趙壹囊空多酒債陸澄櫛

儉愧書淫桑樞席戶貧兼病敢負青雲一片心

旅食江村人事都廢不見竇伯已逾二載

賦此奉贈以寄相思 確庵 瑚

馮公曾感太沖深君似聞孫繼德音知命躬能  
持白璧違時口不道黃金鷺羣書帖雙鉤聖牛  
角中箱萬卷淫却笑天公窮未盡但窮祿位未  
窮心

贈海上顧聖服

瀕海翛然隱者居荔帷蘿幌黑甜餘殷勤放去稱

名鳴次第呼來就食魚。瑪瑙香光浮蟻酒。琉璃眼界讀蠅書。三吳四姓知名久。癡絕雲孫最盛譽。

春兩閑居因成回文五十六言寄梅仙

春雲壓樹寒煙遠。細竹風吹冷巷門。醇酒消愁和好夢。晚花泣雨似含冤。新芽弱草和苔厚。舊壘殘泥識燕馴。塵榻連宵清話久。輪蹄惜別欲消魂。

虞牧宗叔六十生日

卓立詩壇六十年。吾宗何幸得名賢。春風宇下消寒暑。秋水門前接地天。古處自尋名教樂。高懷惟

與醉鄉便。雙龍三鳳前為壽。十里雲林奏管弦。

秋日陸拱辰過訪有贈奉酬

時拱辰讀書南村

三年一水隔。足未到南村。岑寂秋光遠。翩然款我門。見惟邀倡和。坐不道寒暄。回首人間世。桐焦幸強存。

錄默庵世父詩。淒然有感。

先伯以懷舊詩選為怨家所誣

死於酷吏之手

一編懷舊意。何窮腸斷身。填犴狴中。北海才高旋禍及。南山歌邁竟冤終。可知守黑方能白。應歎持

雌始是雄千古射洪憎段令從來天道竟夢夢

確庵夫子六十生日 六首

泰岱還成浩劫塵休將人世更傷神  
虛舟不觸兼天浪處處壺中可避身

不虞陵谷不憂貧乖亂人倫最惱人  
柱地撐天惟一綫婁江江曲祝長春

人心漸漸不如初禾黍依然遍故墟  
爲問龍門十二策何如智井一函書

處非天意出非時鳳翮迴翔下止遲  
莫道春秋又

六十此中消息杳難知

數仞宮牆未得門等閑樗散負師恩  
年來領取幽

違意別自尋詩落菜村

斯文誰不願無疆春酒同人共遠將  
何處雪鴻踪

跡在張公霧市鄭公鄉

邂逅張某口占

借得田家酒一尊開襟共話水雲村  
浮生聚散知何定莫遣愁痕閒醉痕

禹思張子五十初度斐然有作不揆蕪陋

倚韻繼聲 四首

風和仲蔚宅。春影動簾衣。竹翠龍孫老。桐香鳳子  
飢。墨莊雲氣聚。花逕屐痕稀。一枕羲皇夢。明霞帶  
夕暉。

埋首書城內。燈明夜讀孤。高文分甲乙。殘帙按平  
乎。才擬詩中虎。珍推席上儒。莫驚雙鬢改。聲譽動  
吳趨。

此日狂瀾勢。誰爲獨障東。江村閑國士。山郭隱宗  
工。綠樹榮枯易。青編得失空。晨星幾同志。舒嘯碧

雲中

朝露研朱豔。微言盡五千。緒風吹蕙圃。遲日過椿  
年。螳臂人心險。羊腸世路澶。尊羹與鱸膾。道似步  
兵賢。



大正

五

1

...

